

ATIA preocupa tocante maneho di desperdicio



ORANJESTAD – Durante fin di año 2017 pa cuminsamento di año 2018 ATIA a forma parti di un grupo di trabao di december 2017 pa januari 2018, cu tawatin como meta pa bin cu algun solucion pa e maneho di desperdicio a corto, medio y largo plaso. ATIA a forma parti di grupo a peticion di Minister di Desaroyo Teritorial, Infraestructura y Medio Ambiente.

Den e rapport final "Final Report Integrated Solid Waste Management Aruba" a recomenda pa e termino largo bin cu un 'Request for Information' (RFI) pa un asina yama "solid waste management facility with thermal, recycling and sanitary landfill". E grupo di trabou den su composicion original, a wordo disolvi asina e rapport a keda cla y no a forma parti di e proceso di RFI.

Segun e comunicado cu Bon Dia Aruba a ricibi ta identifica cu algun luna pasa ATIA a tuma nota cu gobierno a inicia un destaho pa yega na construcion di un insinerado. Tambe ATIA (tambe) a ricibi copia di e rapport di Arcadis (Verwerking van afval op Aruba) di dia 8 di juli 2019 cu ta hopi critico ariba plan pa construi un insinerado na Aruba como solucion pa nos desperdicio. Pa tal motibo ATIA a dirigi un carta na Minister ariba dia 30 di juli 2019 treciendo y siguiente observacionnan, preocupacionnan y preguntanan dilanti:

- E problema di procesamiento di desperdicio na Aruba ta un problema grave cu ta rekeri un solucion sostenibel. Minister di Finanzas, Asuntunan Economico y Cultura a publica un "Economic Policy" den cual e ta enfatisa e necesidad di crea un balans entre desaroyo economico y nos naturalesa. Ademas ta menciona "Circular Economy" como un di e pilarnan economico prometededor. Esaki, hunto cu e adopcion di e agenda 2030 di e Sustainable Development Goals of United Nations, ta desaroyonan y enfokenan positivo cu ATIA ta aplaudi. Parce cu e plan pa construi un insinerado sinembargo no ta esun mas sostenibel ni ta stimula un "Circular Economy" como pilar economico prometededor.

- For di sector priva a bin un solucion alternativo, caminda lo exporta e desperdicio procesa y paketa pa wordo uza como combustibel pa un fabrica di cement. E fabrica lo reemplaza uzo di carbon cu e uzo di desperdicio procesa. Den e rapport di Arcadis cuater diferente metodo di procesa desperdicio ta wordo compara y nan impacto riba tereno social, economico, futuro perspectiva y medio ambiente y segun tal rapport un insinerado ta e opcion cu ta score mas abou pa Aruba. ATIA a pidi Minister su opinion riba e rapport aki y si algun estudio comparabel a wordo haci di banda di gobierno pa e impacto di un insinerado prome cu e destaho a wordo anuncia y si un cu e otro ta motibo pa adapta maneho.

- Ademas, ATIA a expresa preocupacion riba e hecho cu Minister a anuncia un cambio di ley, den cual lo obliga tur compania cu ta piki desperdicio pa hiba esaki exclusivamente na e compania estatal, Serlimar. Esaki lo duna Serlimar un posicion di monopolio y lo por tin como resultado cu companianan local, priva y estableci lo haya nan mes obliga di cera nan porta como cu no tin fluho di desperdicio mas pa maneho recicla y/o exporta. Esaki ta un desaroyo alarmante, ya cu e lo ataca nos sistema di comercio liber y lo crea un precedente indeseabel. Supone cu den un afan pa fortifica Landslaboratorium bin cu un proposito di ley pa "nacionalisa" su servicionan. Kico lo pasa cu e laboratorionan priva y estableci? Nan tambe lo mester cera nan porta? Den opinion di ATIA e cambio di ley pa fortifica e posicion di Serlimar ta bay contra e intencion delinea den e Economic Policy, caminda ta menciona cu mester stimula comercio y 'entrepreneurship' pa duna economia e impulso necesario y via esaki aumenta e entradanan di impuesto pa gobierno.

- ATIA a puntra Minister tambe, si e rekisitonan pa cu e destaho publico pa e insin-

erado a wordo ahusta di algun forma of otro, ya cu no a ricibi ningun inscripcion pero a dicidi toch pa extende e periodo cu 90 dia. Kisas e falta di interes tin di haber cu e factibilidad y rendabilidad di e proyecto aki, mirando e cantidad limita di sushi cu e isla ta produci?

- Por ultimo, ATIA a trece dilanti e costo di haci negoshi na Aruba, cu durante e ultimo añanan a bin ta aumenta. A conoce un aumento di BBO y BAZV, a introduci e BAVP, salario minimo a wordo aumenta, e parti cu doño di trabou ta paga pa AOV a aumenta, e drempele di salario pa AOV/AWW a wordo hisa considerablemente, a conoce inflacion, cantidad di oranan di trabou pa siman a wordo corta, banconan a introduci costonan adicional pa compra y benta di moneda stranhero, grondbelasting a aumenta drasticamente, accijns a wordo aumenta, y e tipping fee pa comercio tambe a subi substancialmente. Na mes momento, e productividad den departamentonan di gobierno (cu excepcion di algun) no a melhora y e nivel di e debe nacional ta sigui riba un nivel irresponsabelmente halto sin cu tin plannan concreto y conocí pa un y tur pa cu con lo remedia e situacion financiero di pais Aruba. Realizacion di e proyecto di insinerado lo bolbe trece un costo adicional pa comercio y pueblo, cu na e momento aki no por carga mas.

Ariba dia 1 di augustus 2019, ariba invitacion di Minister, a tuma luga un reunion informativo pa varios gremio comercial tocante e proceso di procesamiento di desperdicio na Aruba.

Durante e reunion, Minister a describi e proceso cu a tuma luga pa yega na e decision di un destaho publico pa un insinerado y aunke algun di e preguntanan di ATIA a wordo trata durante e reunion ainda e preocupacionnan di ATIA no a wordo elimina. Pa tal motibo ATIA lo keda vigila e proceso di e destaho y di cambio di ley y lo keda en espera di e contesta di Minister ariba ATIA su carta di dia 30 di juli 2019.